



PITULUNG NU DATANG TI LUHUR

Disusun ku: Watson Goodman

Haratis lain pikeun jualeun

PITULUNG NU DATANG TI LUHUR

"PITULUNG NU DATANG TI LUHUR" dibukukeun dina ukuran alit supados gampang dicacandak, sarengna deui ku saderek tiasa dianggo pikeun ngeusi waktos, sabot saderek ngantosan salah sawios kenalan atanapi nuju ngantosan kendaraan. Waktos anu kosong ieu tiasa ku saderek dieusi ku hal-hal anu teu kinten mangpa'atna pikeun jiwa saderek.

Ayat-ayat anu ngeunaan poko-poko dina buku ieu kening nyutat tina Kitab Suci ku sabab sim kuring percanten, yen komentar anu pangsaena ngeunaan sagala bagian Kitab Suci nya Kitab Suci eta.

Dawuhan Allah nu datangna "ti Nu Agung" teu kinten mangpa'atna pikeun hate anu lapar sarta hanaang ku bebeneran. Sing saha anu tobat sareng ninggalkeun dosa-dosana sarta percaya ka Gusti Yesus Kristus salaku Jurusalametna kalayan sagemblengna hate, tinangtos Anjeunna ngauban ka manehna sarta masihan kabungahana-Na sareng katengtremana-Na. Sim kuring ngalaman ieu dina taun 1937 sarta ti mimiti harita hubungan anu endah antara sim kuring sareng Gusti Allah teu acan kantos pegat. Sim kuring ngajak ka saderek pikeun masrahkeun hirup saderek ka Anjeunna upami saderek teu acan ngalaksanakeun hal ieu, waktosna nya ayeuna pisan.

—Watson Goodman (1920-2002)

KAASIH GUSTI ALLAH

1

Tapi Allah mah geus nembongkeun asih-Na ka urang. Kristus pupus ngaganti urang sajeroning urang keur hirup keneh dina dosa. —Rum 5:8

Pisapoeun deui kana poe Pesta Paska, Yesus uningaen yen Anjeunna geus tereh ngantunkeun alam dunya, kudu mulih ka Rama-Na. Anjeunna kacida mikaasihna ka umat kagungana-Na anu araya di ieu dunya, asih nepi ka ahir.

—Yohanes 13:1

Jeung ti Yesus Kristus, Saksi anu satia, anu pangheulana digugahkeun tina maot, panguasa raja-raja saalam

dunya. Kristus teh asih ka urang, pupus-Na teh ngajait urang tina dosa. —Wahyu 1:5

Karana kacida mikaasihna Allah ka alam dunya, nepi ka masihkeun Putra tunggal-Na, supaya sakur anu percaya ka Anjeunna ulah binasa, tapi meunang hirup langgeng.

—Yohanes 3:16

Anu henteu boga sipat asih teu terang ka Allah, sabab Allah teh sipat asih. Allah geus ngabuktikeun sipat asih-Na, ku ngutus Putra tunggal-Na ka ieu dunya, supaya ku jalan Putra-Na urang meunangkeun hirup.

—1 Yohanes 4:8, 9

2

KAILAHIAN YESUS KRISTUS

Geus teu bisa dibantah deui, rasiah ibadah urang teh kacida agungna: Kristus geus mijalma jadi manusa, hal eta ku Roh Suci geus dibuktikeun benerna, para malaikat saksina, dimashurkeun ka bangsa-bangsa, dipercaya ku saalam dunya, ayeuna Anjeunna geus diangkat ka sawarga.

—1 Timoteus 3:16

Pang kajadian kitu teh supaya laksana sabda Allah anu diandikakeun ka nabi baheula, ungelna, "Hiji parawan bakal ngandung, ngowokeun putra pameget anu pijenenganeunana Immanuel" (hartina "Allah nyarengan ka urang").

—Mateus 1:22, 23

"Anu geus nenjo Kami tangtu nenjo ka Rama, ku naon ceuk maneh bieu 'Tingalikeun Rama teh ka abdi-abdi'? Na teu percaya maneh, Pilipus, yen Kami jadi hiji jeung Rama?"

—Yohanes 14:9b, 10a

Ari nu disebut Pangandika teh geus jumeneng ti memeh ieu dunya dijadikeun; Pangandika sasarengan jeung Allah, Pangandika sarua jeung Allah... Pangandika teh terus mijalma, jadi manusa, hirup di kalangan urang, jembar kurnia jeung saestu sipat-Na tur mulya kaayaan-Na, sarta kamulyaana-Na teh tembong ka urang, kamulyaan ti nu jadi Rama ka Putra tunggal.

—Yohanes 1:1, 14

YESUS, PUTRA ALLAH

3

Sakumna sipat katuhanan Allah aya di Kristus dina wujud kamanusaana-Na.

—Kolosa 2:9

Malaikat ngawaler, "Nyai bakal disumpungan ku Roh Suci, bakal diliputan ku kakawasaan Allah. Ku sabab kitu eta putra anu bakal medal teh suci, bakal disebut Putra Allah."

—Lukas 1:35

Petrus keur unjukan keneh, bray aya mega ngagebray turun mayungan ka aranjeunna. Tina eta mega aya soara, ungelna, "Tah ieu teh Putra Kami, kaasih Kami, anu kamanah ku Kami.

Masing ngagugu ka Anjeunna!"

—Mateus 17:5

Jelema anu ngaku yen Yesus teh Putra Allah, hirupna satunggal jeung Allah, nya kitu keneh Allah manunggal dina hirupna.

—1 Yohanes 4:15

Eusina ngeunaan Putra-Na, Gusti urang Yesus Kristus, turunan Daud dina kaayaan kamanusaana-Na mah, tapi sacara rohani Anjeunna teh Putra Allah. Hal ieu dibuktikeunana teh ku hiji kakawasaan anu luar biasa, Anjeunna digugahkeun tina maot.

—Rum 1:3, 4

4 YESUS NETELAKEUN KA URANG, SAHA ANJEUNNA TEH

Maraneh ka Kami nyarebut Guru jeung Gusti. Bener eta teh.
-Yohanes 13:13

Pilahir Yesus, "Aranjeun asal ti handap, ti ieu dunya. Ari Kaula mah asal ti luhur. Aranjeun asal ti dunya, Kaula mah lain ti ieu dunya."
-Yohanes 8:23

"Ari kami, sapanjang di dunya keneh, Kami teh caangna alam dunya."
-Yohanes 9:5

Saur Yesus, "Eta roti anu matak hirup teh kapan ieu, Kami. Jalma anu datang ka Kami moal nyorang lapar

deui, anu percaya ka Kami moal nyorang halabhab deui."
-Yohanes 6:35

Waler Yesus, "Kami teh anu ngahudangkeun jeung anu ngahirupkeun. Anu percaya ka Kami tangtu bakal hirup sanajan geus maot."
-Yohanes 11:25

Waler Yesus, "Saenyana, memeh Ibrahim dijurukeun, Kami geus jumeneng."
-Yohanes 8:58

Yesus nyarios deui, "Supaya kaharti Urang terangkeun: Anu diupameukeun lawang teh Kami."
-Yohanes 10:7

SABABARAHA TANDA AJAIB ANU DIPIDAMEL KU YESUS

5

Jalma rea ku Anjeunna dipiwarang dariuk dina jukut. Anjeunna nyandak roti anu lima siki jeung laukna dua siki, tuluy tanggah muji sukur ka Allah. Rotina disemplekkan tuluy diasongkeun ka murid-murid sina dibagikeun. Jalma rea dalahar sareu-beuheun. Sesa ngadahar ku murid-murid dikumpulkeun meunang dua welas karanjang. Nu disuguh dahar teh aya lima rebu urang, jaba aweue jeung barudak.
-Mateus 14:19-21

Rengse ngawulang Anjeunna ngalahir ka Simon, "Ieu parahu ka tengahkeun deui ka nu jero, pasang deui jaringna jeung batur, ngala

lauk." Ceuk Simon, "Parantos sawewengi abdi-abdi ngala lauk teh, Juragan! Nanging henteu kekengingan. Ayeuna ku margi Juragan miwarang, mangga jaring bade dipasang." Prak maranehna nurunkeun jaring. Lauk anu beunang kacida lobana, jaringna mani meh bedah.
-Lukas 5:4-6

Di sisi jalan aya nu lolong duaan keur dariuk. Barang ngadarenggeun Yesus ngalangkung, tuluy tinggarero, "Putra Daud! Sing hawatos ka abdi!"...Yesus welaseun, seug panon maranehna diusap, bray bae bareunta barisa nenjo, tuluy ngiring ka Anjeunna.
-Mateus 20:30, 34

6 YESUS KRISTUS NU NYIPTAKEUN SAGALA RUPI TEH GUSTI

Ayeuna, dina jaman ahir, ngandika-Na ka urang ku perantaraan Putra-Na, anu geus digadangkeun bakal diserenan hak kana saniskara hal. Allah ngajadikeun langit jeung bumi oge ku perantaraan Putra-Na.
-Ibrani 1:2

Kapan Kristus pupus jeung gugah hirup deui teh supaya jadi Gustina anu harirup jeung nu geus maraot.
-Rum 14:9

Sabab nya ku Anjeunna Allah ngajadikeun saniskara nu aya di langit jeung di bumi, nu katingal jeung nu teu katingal, kaasup roh-roh kawasa, pupunjunan-pupunjunan,

pangawasa-pangawasa jeung sakur anu nyakrawati di alam gaib. Sakumna alam ciptaan Allah diwujudkeunana teh ku Kristus jeung keur Kristus.
-Kolosa 1:16

Ku sabab kitu sakumna urang Israil perlu terang enya-nya, yen anu ku Allah geus dijenengkeun Gusti jeung Jurusalmet teh nya eta Yesus anu disalibkeun ku aranjeun tea.
-Rasul-rasul 2:36

Allah anu nuyun aranjeun ngahiji jeung Yesus Kristus Putra-Na teh bisa ku aranjeun diandel.
-1 Korinta 1:9

YESUS KRISTUS HAKIM PIKEUN SAKABEHNA

7

Ku sabab kitu aranjeun anu ngan ngadahar sayur-sayuran, ku naon nyalahkeun ka pada dulur? Sarta aranjeun anu yakin meunang ngadahar naon bae, ku naon moyok ka pada dulur? Urang kabeh bakal jogo di payuneun Allah pikeun diadilkan.
-Rum 14:10

Jelema-jelema saalam dunya bakal dijagragkeun ka payuneuna-Na. Anjeunna bakal misah-misahkeun maranehna jadi dua bagian, saperti pangangon misah-misahkeun domba ti embe.
-Mateus 25:32

Rama ku manten moal ngahukum ka saha-saha, sabab hak ngahukum

sagemblengna geus diserenkeun ka Putra.
-Yohanes 5:22

Nurutkeun Injil Kasalametan anu ku sim kuring diwararkeun, nya kitu pijadieunana engke teh, dina Poe Hukuman. Poe eta Allah ku jalan Yesus Kristus bakal nerapkeun hukum adil kana sagala hal anu aya di jero hate manusa.
-Rum 2:16

Bapa sareng babaturan ku Anjeunna dipiwarang ngembarkeun Injil Kasalametan sareng mertelakeun yen Anjeunna teh ku Allah parantos dijenengkeun hakim sakumna manusa, boh anu harirup keneh boh anu parantos maraot.
-Rasul-rasul 10:42

8 PANEBUSAN MUNG NGALANGKUNGAN KRISTUS

Anjeunna, sareng mung Anjeunna bae anu tiasa nyalametkeun manusa teh. Di saalam dunya teu aya deui manusa anu ku Allah dipaparin kawasa nyalametkeun, mung Yesus Kristus.
-Rasul-rasul 4:12

Nya Kami lawangna. Anu asupna ti Kami tangtu salamet, jeung bisa asup atawa kaluar ka sampalan.
-Yohanes 10:9

Aranjeun oge pang bisa ngahiji jeung Kristus Yesus teh ku sih kurnia Allah, ari Kristus ku Mantenna dijadikeun kabijaksanaan urang, tegesna kabijaksanaan urang teh asalna ti Kristus. Nya ku Anjeunna

pang urang bisa diangken bener ku Allah teh, pang urang jadi umat suci Allah, pang urang bisa bebas.
-1 Korinta 1:30

Anu matak ceuk Kaula tadi aranjeun bakal maraot dina dosa. Tangtu aranjeun teh bakal maraot dina dosa, lamun teu palercaya yen 'Kami teh Anu Jumeneng.'
-Yohanes 8:24

Ku lantaran kitu Yesus salawasna iasa nyalametkeun manusa anu datang ka Allah liwat Anjeunna, sabab Anjeunna, anu jumeneng salalanggengna bakal mangmundutkeun kasalametan manusa ka Allah.
-Ibrani 7:25

PANEBUSAN MUNG NGALANGKUNGAN KRISTUS

9

Putra Manusa pang sumping teh rek neangan jeung nyalametkeun jelema nu leungit.
-Lukas 19:10

Waler Gusti ka Tomas, "Kami jalanna, Kami kayaktian, Kami sumberna hirup. Ku sabab eta, lamun henteu ku jalan Kami, moal aya anu bisa datang ka Rama."
-Yohanes 14:6

Mugi tekad dulur-dulur dikuatkeun ku kaagungan kawasa Allah, sanggup jeung sabar tawekal nandangan sagala cocoba, dibarengan ku kabunghah jeung pamuji sukur ka Rama, anu mikersa supaya aranjeun layak

meunang bagian ti nu geus disadiakeun pikeun umat-Na di karajaan caang. Urang ku Mantenna geus dijait tina genggeman kawasa poek, salamet dicandak ka karajaan Putra-Na kaasih, anu geus ngabebaskeun urang, tegesna ngahampura dosadosa urang.
-Kolosa 1:11-14

Aranjeunna ngawihkeun hiji pupujan anyar, ungelna: "Nya Andika anu layak nampina, sareng muka segel-segelna. Reh Andika parantos ditelasan. Nyawa Andika nebus umat Allah sakumna, ti saban kaom, saban basa, saban bangsa, saban seler bangsa."
-Wahyu 5:9

10 PANEBUSAN DOSA MUNG KU GETIH KRISTUS

Ku pupusna Kristus, urang bisa diangken bener deui ku Allah, malah-malah ku Anjeunna bakal diluputkeun tina bebendu Allah.

-Rum 5:9

Lamun hirup urang geus di nu caang sakumaha Mantenna anu jadi Cahaya Caang, eta ciri diri urang geus beresih tina dosa ku karana getih Yesus Putra-Na, sarta bakal bisa hirup sabeungkeut jeung pada batur.

-1 Yohanes 1:7

Aranjeun geus terang, naon anu ku Mantenna dianggo nebus aranjeun supaya bebas tina kalakuan anu taya paedahna tuturunan ti karuhun. Lain ku barang anu sok ruksak saperti

upamana perak atawa emas, tapi ku anu kacida mulyana, ku anu diibaratkeun "domba anu taya cacad kuciwana", nya eta Kristus anu dikurbankeun ka Allah.

-1 Petrus 1:18, 19

Lamun getih jeung lebu sato tea bisa ngaberesihkeun kokotor diri manusa, geus komo deui getih Kristus! Ku jalan Roh anu langgeng Kristus ngurbankeun salira-Na ku anjeun ka Allah, jadi kurban anu sampurna. Getih Anjeunna ngaberesihkeun batin urang tina hal-hal anu taya mangpa'atna, nepi ka urang bisa ngabakti ka Allah anu jumeneng.

-Ibrani 9:14

KASALAMETAN MUNG KU LANTARAN IMAN DI LEBET KRISTUS

11

Aranjeun oge pang salamet teh ku karana sih kurnia Allah lantaran percaya ka Yesus, nugraha ti Allah, lain beunang ihtiari sorangan. Moal aya jelema anu salamet ku ihtiarna sorangan, jadi ulah nyombong ku hal eta.

-Epesus 2:8, 9

Sanggeus urang diangken bener deui ku Allah ku jalan percaya, urang teh ku Allah dirapihan deui ku jalan Yesus Gusti urang.

-Rum 5:1

Pikeun anu hirupna ngahiji jeung Kristus Yesus, disunat jeung teu disunat teu jadi soal. Nu perlu mah

nya eta percaya, ari percaya bisa ditembongkeunana teh ku silih pikanyaah.

-Galata 5:6

Tapi sakabeh anu geus dituliskeun maksudna netelakeun yen Yesus teh Kristus Jurusalamet, Putra Allah, supaya dulur-dulur percaya ka Anjeunna tangtu meunangkeun hirup.

-Yohanes 20:31

Piunjuk maranehna, "Kedah kumaha atuh abdi-abdi supados tiasa ngalampahkeun pangersa Allah?" Waler Yesus, "Kudu percaya ka anu diutus ku Allah! Kitu pangersa-Na teh."

-Yohanes 6:28, 29

12 RAHMAT ALLAH

Malah saenyana mah, sakumaha jauhna tanah ka langit, nya sakitu rosana kawelasan-Na ka sakur anu hormat ka Mantenna teh.

-Jabur 103:11

Urang teh dijait disalametkeun. Tapi disalametkeun ge lain ku sabab urang geus migawe anu hade, tapi ngan ku perbawa sih piwelas-Na, anu dilaksanakeunana ku Roh Suci. Rereged diri urang teh ku Roh Suci dikumbah beresih, nepi ka hirup urang jadi anyar.

-Titus 3:5

Puji jeung sukur kasanggakeun ka Allah, Ramana Gusti urang Yesus Kristus! Allah teh ku bawaning mikawelas geus midamel urang jadi

manusa anu anyar dina hirup anu anyar, anu geus boga hiji pangharepan anu moal pareum-pareum, ku jalan Mantenna ngahirupkeun deui Yesus Kristus tina pupus-Na.

-1 Petrus 1:3

Tapi Allah teh jembar ku piwelas, sakitu asih-Na ka urang. Urang anu keur paeh rohani lantaran baha, ku Mantenna dihirupkeun deui bareng jeung Kristus. Jadi pang urang salamet teh ku karana sih kurnia Allah.

-Epesus 2:4, 5

Sugri nu mikaaajrih ka Mantenna, turun-tumurun ku Mantenna dipikawelas.

-Lukas 1:50

ALLAH NYAURAN URANG SANGKAN DATANG KA ANJEUNNA

13

Hiap datang ka Kami, sakur nu maropo jeung nu kalempohan sarta nu ngarasa beurat ku momotan, ku Kami rek direureuhkeun.

-Mateus 11:28

Roh jeung Panganten Istri tea unjukan, "Sumangga sumping!" Anu ngadareng hal ieu oge kudu unjukan kitu, "Sumangga sumping!" Nu halabhab ka darieu! Saha bae anu hayang cai anu matak hirup, jadi ganjaran.

-Wahyu 22:17

Dina panutupan pesta, poe anu pangpentingna, Yesus ngadeg tuluy ngalahir tarik, "Saha-saha anu ha-

labhab, hiap ka Kami nginum!"

-Yohanes 7:37

Jelema anu ku Rama dipaparinkeun ka Kami, tangtu datang ka Kami sarta ku Kami moal datang ka ditolak.

-Yohanes 6:37

Geus kitu ngalahir ka sarerea, saur-Na, "Lamun aya anu rek milu ka Kami kudu miceun kapentingan sorangan, unggal poe kudu manggul salibna, heug anut ka Kami."

-Lukas 9:23

Sakumaha ungel Kitab Suci, "Saha-saha anu sasambat neda pitulung ka Mantenna tangtu disalametkeun."

-Rum 10:13

14 SANES SADAYANA JALMI PUTRA-PUTRA ALLAH

Ari bedana antara putra-putra Allah jeung anak-anak Iblis teh tetela pisan, nya eta: Sing saha anu lampahna teu bener jeung teu nyaah ka dulur, eta lain putra Allah.

-1 Yohanes 3:10

Sakur jelema anu dituyun ku Roh Allah, eta teh putra-putra Allah.

-Rum 8:14

Tembongkeun yen aranjeun mulus laku beresih hate, sampurna taya kuciwa, sakumaha layakna anu jadi putra Allah di tengah jelema-jelema nu teu balener di ieu dunya nu pinuh ku dosa. Enggonging ngawartakeun wawaran perkara hirup ka nu sejen, kudu jadi saibarat bentang-bentang anu nyaangan langit.

-Pilipi 2:15

Ku sabab kitu ngandika Allah, "Tinggalkeun jalma anu daroraka, pisahkeun diri ti maranehna. Ulah ngayakeun naon-naon jeung sakur nu najis, tangtu maraneh ditarima ku Kami. Kami baris jadi Rama maraneh, maraneh baris diaku anak ku Kami, anak lalaki anak, awewe, kitu timbalan Pangeran Nu Maha Kawasa."

-2 Korinta 6:17, 18

Tapi loba oge anu narima jeung palercaya ka Anjeunna teh; jelema-jelema anu kitu ku Anjeunna dipaparin hak jadi putra-putra Allah.

-Yohanes 1:12

NAON ANU DIDAWUHKEUN KU ALLAH PERKAWIS PANGAJAK NAPSU JEUNG INUMAN KERAS

15

Jaga diri! Ulah beuki teuing pepes-taan jeung nginum-nginum atawa mikiran teuing kipayah, bisi ujung-ujung kagubed ku eta Poe.

-Lukas 21:34

Nginum anggur ulah nepi ka mabok, matak ruksak awak, sabalikna kudu kacicingan ku Roh Allah.

-Epesus 5:18

Napsu badan ngajakna kana rucah, aeb, teu uni, muja brahala, sihir, ngamusuh, gelut, dengki, ngumbar amarah, mentingkeun sorangan, papecah, sirik-pidik, beuki kana ma-

bok, ria-ria, jeung salian ti eta. Sim kuring rek ngingetan deui cara nu enggeus-enggeus yen anu kalakuanana kitu moal meunang tempat di Karajaan Allah.

-Galata 5:19-21

Tingkah laku masing luyu sakumaha pantasnya hirup dina caangna beurang - ulah pepes-taan bae, ulah mabok, ulah rucah, ulah aeb, ulah gelut, ulah dengki. Cekel pakarang ti Gusti Yesus Kristus, ulah ngumbar pidosaean ngalajur napsu.

-Rum 13:13, 14

KU KARIDOAN WUNGKUL MAH TEU ACAN CEKAP

"Lain anu ngan semet nyambat ka Kami 'Gusti, Gusti!' anu bakal asup ka sawarga teh, tapi anu ngalampahkeun pangersa Ama Kami nu di sawarga."
-Mateus 7:21

Barang Yesus rek angkat neruskeun perjalanan, aya nu lumpat nyampeurkeun, terus deku di payuneuna-Na. "Pa Guru nu sae," carekna, "kedah kumaha lampah abdi supados kenging hirup langgeng?" Waler Yesus, "Ku naon Kami disebut hade? Jelema mah taya nu hade, ngan Allah bae. Hidep tangtu nyaho parentah-parentah anu kieu: Ulah maehan;

ulah ngaranyed; ulah maling; ulah jadi saksi bohong; ulah nipu; sing hormat ka indung bapa." "Pa Guru," jawabna, "eta ku abdi parantos dilakonan ti aalit." Eta jelema ku Yesus dipeleng bangun nyaah. "Tinggal sarupa deui," saur-Na, "jualan kabeh babandaan hidep, duitna serenkeun ka kaom miskin supaya hidep beunghar di sawarga. Geus kitu ka dieu, tuturkeun Kami." Diwaler kitu teh beungeutna mani alum, terus undur bangun nalangsa, kawantu kacida beungharna.

-Markus 10:17-22

ULAH KATIPU

Eta pangandika-Na ulah ngan semet didengekeun, kudu jeung prak dilampahkeun, supaya ulah disebut nipu diri sorangan. -Yakobus 1:22

Kade, ulah kaperdaya ku omongan-omongan anu sipatna gejul. Sabab tina hal-hal nu karieu pisan pang Allah bendu ka nu baha ka Mantenna teh. -Epesus 5:6

Sageuy aranjeun tacan tarerang, jelema jahat moal bisa jadi umat Karajaan Allah. Ulah ngabobodo maneh. Jelema anu ingkar tina susila, atawa anu nyembah ka brahala, atawa anu jinah, atawa lalaki sapat-

mon jeung lalaki deui, atawa anu maling, atawa anu hawek, atawa bangsat - moal jadi umat Karajaan Allah. -1 Korinta 6:9, 10

Kade anaking, ulah rek kabengbat ku sasaha. Sing saha anu milampah sapangersa Allah, eta teh putra Allah, sakumaha Kristus jadi Putra Allah. Sing saha anu milampah keneh dosa eta teh biluk ka Iblis, sabab Iblis mah geus nyieun dosa ti barang mimiti.

-1 Yohanes 3:7, 8a

Anu sok ieu aing jelema penting padahal teu aya naon-naonna, sasat ngabobodo maneh. -Galata 6:3

DOSA TEH MAWA KANA MAOT

Hawa napsu anu dijujur ngabalukarkeun dosa; lamun dosa geus meujeuhna gedena, bakal ngabalukarkeun maot. -Yakobus 1:15

Pikiran anu dipurba ku tabeat sorangan nungtun kana maot; pikiran anu ditungtun ku Roh Allah nungtun kana hirup jeung kanugrahaan.

-Rum 8:6

"Pantes lamun urang ayeuna sukan-sukan suka bungah, sabab adi ujang anu sasatna geus paeh ayeuna hirup deui, leungit datang deui."

-Lukas 15:32

Naon kauntungan aranjeun tina eta kalakuan, anu ayeuna mah aranjeun

era lamun ngalampahkeun? Balukarna taya lian ti maot! -Rum 6:21

Sabalikna anu jejerih ku paeh, anu hianat, anu murtad, anu maehan, anu tuna susila, tukang sihir, anu muja brahala, jeung tukang bohong, bagianana paeh kadua, nya eta lautan seuneu jeung walirang.

-Wahyu 21:8

Dosa asup ka dunya ku lantaran jelema saurang. Eta dosa mawa maot. Balukarna, maot teh sumebar sarta tumerap ka sakumna manusa, sabab sakabeh manusa geus keuna ku dosa. -Rum 5:12

KRISTUS NGELEHKEUN MAOT

Sangeus ngalahir kitu, soanten-Na ditarikkeun, "Lasarus! Geura bijil!" Kurunung, Lasarus nu geus maot teh kaluar, suku jeung leungeunna kabungkus keneh ku boeh, beungeutna kabulen ku cindung. Saur Yesus, "Bukaan; sina bisaean leumpang." -Yohanes 11:43, 44

Ama nyaheun ka Kami, lantaran Kami ikhlas ngorbankeun nyawa anu tangtu bakal katarima deui. Saenyana moal aya anu bisa ngarebut nyawa Kami. Dikorbankeun oge ku karena kaiklasan Kami; Kami kawa sa nye-

renkeun, kawasa nyokotna deui. Kitu pangersana Ama Kami.

-Yohanes 10:17, 18

Kami teh anu jumeneng. Kami geus paeh, tapi ayeuna Kami hirup salalanggengna. Kami kawasa kana paeh jeung ka tempat nu paraeh.

-Wahyu 1:18

Anjeunna nyaketan pasaran terus pasaranana dicabak. Anu ngagaro-tongna ngarandeg. Yesus ngalahir, "Agus, Kami nitah, geura hudang!" Mayit teh ngulisik, diuk tuluy ngomong. -Lukas 7:14, 15a

HUKUM-HUKUM ALLAH

Pokna, "Guru, parentah nu mana dina Hukum Agama anu pangutamana?" Waler-Na. "Masing nyaah ka Pangeran Allah maneh terus jeung hate, terus jeung nyawa, sarta terus jeung budi akal.' Ieu parentah anu pangutamana jeung pangpentingna. Nu kadua sarua pentingna, nya eta: 'Masing nyaah ka batur kawas ka diri sorangan.' Sakabeh eusi Hukum Musa jeung pangajaran nabi-nabi lianna, gumantungna ka ieu dua parentah." -Mateus 22:36-40

Ayeuna maraneh ku Kami dibere hiji parentah anyar, nya eta: Masing silih pikanyaah. Sakumaha Kami mikanyaah ka maraneh, maraneh

oge kudu silih pikanyaah sabaturbatur. -Yohanes 13:34

Hidep tangtu nyaho parentah-parentah anu kieu: Ulah maehan; ulah ngaranyed; ulah maling; ulah jadi saksi bohong; ulah nipu; sing hormat ka indung bapa.

-Markus 10:19

Naon bae anu ku urang disuhunkeun ka Mantenna bakal dipaparinkeun eta: Urang kudu percaya ka Yesus Kristus Putra-Na, reujeung kudu silih pikanyaah sakumaha anu dipiwarang ku Kristus.

-1 Yohanes 3:22, 23

URANG MOAL TIASA NYUMPUT TI ALLAH

Naon bae anu dibuni-buni bakal katembong sarta kabuka, jeung naon bae anu ditutupan bakal kapanggih sarta kanyahoan. -Lukas 8:17

Ngungsi ka langit, Gusti aya di dinya, nyempod ka alam maot, Gusti aya di dinya. Poek oge keur Gusti mah henteu poek, wengi oge sami caang sapertos siang. Poek sareng caang keur Gusti mah sami bae.

-Jabur 139:8, 12

Jadi naon bae anu ku maraneh diomongkeun di nu poek, bakal kadenge saterang-terangna, jeung naon bae anu ku maraneh diharewoskeun

rurusiahan di kamar anu nutup, geus tangtu bakal diuar-uar.

-Lukas 12:3

Taya hiji hal anu bisa nyamuni ti Allah, kabeh mahluk eces nonggerak katingalieun. Ka Mantenna urang kabeh kudu nyanggakeun tanggung jawab kalakuan. -Ibrani 4:13

Anu matak ari tacan waktuna mah ulah waka nangtukeun batur salah. Dago nepi ka Gusti sumping deui, Anjeunna nu bakal ngaguarkeun sakur anu ayeuna buni, jeung nembrakkeun sagala kereteg anu nyumput dina pikiran manusa.

-1 Korinta 4:5a

**22 HUKUMAN ANU LANGGENG PIKEUN
JALMA-JALMA KAPIR**

Anak Manusa bakal miwarang para malaikat-Na nyabutan sakur anu ngalantarankeun manusa jadi dosa, jeung sakur anu garoreng lampah, dicabutan ti Karajaan-Na, tuluy dialung-alungkeun ka jero pameuleuman anu keur hurung ngagedurgedur.
-Mateus 13:41, 42a

Leungeun atawa suku maraneh lamun nu hiji pidosaeun mah teukteuk bae, piceun! Mending ngan boga leungeun ngan hiji atawa suku ngan hiji tapi salamet, ti batan leungeun suku jangkep tapi diri sakujur dialungkeun kana seuneu langgeng.
-Mateus 18:8

Ari langit jeung bumi anu ayeuna, dimumulena ku Pangandika Allah keneh, sarta bakal dibasmi ku seuneu. Ayeuna diingkeun keneh, ngadago waktuna, nya eta dina poean ngabasmi jelema-jelema doraka.
-2 Petrus 3:7

"Eta jelema-jelema anu karitu bakal dijongklokkeun ka tempat siksaa langgeng," saur Yesus. "Ari anu balener, anu ngalakonan pangersa Allah, bakal hirup bagja tur langgeng."
-Mateus 25:46

Jelema-jelema anu ngaranna henteu aya dina kitab anu harirup, digebrusgebruskeun ka eta lautan seuneu.
-Wahyu 20:15

PANGADILAN BAKAL LAKSANA 23

Margi Allah parantos nangtoskeun poe pikeun ngahukum saalam dunya kalawan adilna. Demi nu bakal jadi hakimna hiji manusa anu dipilih ku Mantenna. Hal ieu ku Mantenna parantos diyakinkeun ka unggal jelema, ku jalan nangkikeun eta manusa ti nu maraot!
-Rasul-rasul 17:31

Tah kitu, Pangeran teh uninga ka jelema anu nurut ka Mantenna, anu kudu disalmetkeun tina sagala gogoda; uninga ka jelema doraka, anu kudu dihukum jeung dikerem ngadago Poe Hukuman.
-2 Petrus 2:9

Sipat asih anu aya di diri urang bakal jadi sampurna, nepi ka urang engke teger ngadeuheus dina Poe Hukuman. Jeung tangtu urang mah teger, lantaran hirup urang di ieu dunya geus nulad ka Kristus.
-1 Yohanes 4:17

Saban jelema kudu maot ngan sakali, tuluy dibawa ka pangadilan Allah.
-Ibrani 9:27

Sabab urang kabeh engke kudu jonghok di payuneun Kristus, dipariksa kalakuan. Unggal jelema bakal narima bagianana satimpal jeung kalakuan hirupna di dunya, hade atawa goreng.
-2 Korinta 5:10

24 SIH KURNIA YESUS KRISTUS

Hayu urang maruji sukur ka Allah anu berkah-Na taya papadana.
-2 Korinta 9:15

Aranjeun geus terang kumaha mura-asihna Gusti urang Yesus Kristus. Anjeunna teh sugih, tapi ikhlas hirup miskin, supaya kasugihan Anjeunna ngabeungharkeun aranjeun.
-2 Korinta 8:9

Tapi sipatna mah teu sarua, sabab eta kurnia Allah teh sipatna kacida bedana ti dosa Adam. Memang, ku dosa hiji jelema, balukarna kudu maot sarerea. Tapi sabalikna kurnia Allah mah sipatna leuwih jembar, anu dipaparinkeunana ku lantaran

kamulyaan manah hiji manusa, Yesus Kristus.
-Rum 5:15

Jadi kabeh oge wungkul gumantung kana sih kurnia Allah, henteu gumantung kana kahayang jeung kalakuan jelema.
-Rum 9:16

Sabab ceuk Kitab Suci, "Allah ngalawan ka nu kamagungan, tapi mikaasih ka nu rendah ati."
-1 Petrus 5:5b

Ani rasul-rasul mertelakeun hal gubahan Gusti Yesus tina pupus teh gede pisan pangaruhna sarta kacida diberkahanana ku Allah.
-Rasul-rasul 4:33

PATOBATAN 25

Lain kitu! Kami ngingetan, maraneh oge lamun henteu tarobat mah bakal paraeh cara kitu.
-Lukas 13:3

Saur Petrus, "Kudu tarobat, jeung kudu dibaptis kalawan asmana Yesus Kristus, tangtu dosa-dosa aranjeun dihampura sarta bakal narampa sih kurnia Allah, nya eta Roh Suci."
-Rasul-rasul 2:38

Ku sabab kitu ayeuna aranjeun teh kudu tarobat, kudu marulang deui ka Allah sangkan ku Mantenna dihampura.
-Rasul-rasul 3:19a

Jaman manusa teu terang ka Allah ku Allah parantos teu diemut-emut. Ayeuna Mantenna mundut supaya manusa di mana-mana tarobat tina dosana.
-Rasul-rasul 17:30

"Geura tarobat," saurna, "sabab Karajaan Sawarga geus tereh ngadeg!"
-Mateus 3:2

Kanalangsaaan oge ari ku Allah di-anggo lantaran sangkan urang eling mah matak jamuga, taya ngarugikeunana. Beda deui jeung nalangsa ku lantaran nyeri hate, eta mah nungtun kana paeh.
-2 Korinta 7:10

26 PANGHAMPURA DOSA

Ieu Kami geus ngetrokan panto. Anu malire kana sora Kami jeung muka panto, tangtu ku Kami dicalikan Kami rek milu dahar di imahna babarengan.
-Wahyu 3:20

Anjeunna ku Allah parantos dijungjung, dijenengeun Pamingpin sareng Jurusalmet, baris mingpin urang Israil kana pertobat supados kenging panghampura dosa.
-Rasul-rasul 5:31

Ningali kapercayaan maranehna sakitu mantepna, Yesus ngalahir ka eta nu lumpuh, saur-Na, "Anaking, dosa-dosa hidep geus dihampura."
-Markus 2:5

Lamun maraneh ngahampura kana

lahan batur, kasalahan maraneh ge ku Rama di sawarga tangtu dihampura.
-Mateus 6:14

Tadina saenyana aranjeun teh maot, maot rohani, ku karana dosa jeung ku karana jadi jelema anu teu disunat sacara lahir. Tapi ayeuna ku Allah geus dihirupkeun bareng jeung Kristus. Dosa-dosa urang ku Allah dihampura kabeh.
-Kolosa 2:13

Dawuhan Pangeran, "Hukum Kami sina ngancik dina batinna, ditulis dina hatena." Saur-Na deui, "Dosa jeung kadorakaan-kadorakaanana ku Kami moal diinget-inget deui."
-Ibrani 10:16b, 17

NGAJAUHKEUN DIRI TINA KADUNYAAN 27

Sabab Allah teh geus nurunkeun nugraha-Na kersa nyalametkeun sakabeh manusa. Eta nugraha Mantenna teh ngadidik sangkan urang mieceun kabiasaan anu doraka jeung napsu kadunyaan, malar hirup di alam dunya teh bisa ngadalian diri, jujur, ibadah.
-Titus 2:11, 12

Ulah milu-milu kana lampah mudadir jelema-jelema nu caricing di nu poek. Sabalikna anggur bawa maranehna ka nu caang.
-Epesus 5:11

Ulah kagendam ku perbawa dunya, atawa naon bae anu asal ti dunya. Lamun kagendam, tanda aranjeun

teu nyaraah ka anu jumeneng Rama. Naon-naon anu aya di dunya, anu jadi panyileukan jelema dosa, anu narik ati jeung kahayang jelema, jeung saniskara bae anu aya di ieu dunya anu diugung-ugung ku jelema, sarupa ge taya anu asalna ti Rama, asal ti dunya keneh.
-1 Yohanes 2:15, 16

Ulah miluan adat kabiasaan ieu dunya. Batin teu sina dianyarkeun ku Mantenna, supaya pikiran aranjeun barobah anyar sama sakali. Ari geus kitu mah tangtu bakal terang kana pangersa Allah, mana nu hade, nu sampurna, nu matak bisa nyukakeun manah-Na.
-Rum 12:2

Jalma anu geus satunggal jeung Kristus, geus jadi manusa anyar, manusa heubeulna geus sirna, kari anu anyarna. -2 Korinta 5:17

Urang terang yen anu geus jaradi putra Allah moal kateterusan migawe dosa, sabab diasuh ku Putra Allah, moal beunang dijailan ku si Jahat. -1 Yohanes 5:18

Sabab ku karana sabda Allah anu sipatna hirup tur langgeng, aranjeun geus jadi jalma anyar, lir anu dijuru-rukeun deui, lain ku manusa anu sipatna keuna ku paeh, tapi ku rama nu sipat langgeng. -1 Petrus 1:23

Waler Yesus, "Kaula rek ngabeja-keun hal anu saenyana, nya eta: Saurang oge moal aya anu bisa asup ka Karajaan Allah, kajaba lamun dijuru-rukeun deui." -Yohanes 3:3

Maraneh nyaho yen Kristus teh bener. Jadi kudu terang deuih yen sing saha anu lampahna bener, nurut ka Allah, eta teh putra Allah. -1 Yohanes 2:29

Ganti kabeh ku hate jeung pikiran anu anyar. Kudu jaradi manusa anyar anu diciptakeunana nurut tuladan Allah, hirup kudu bener, lempeng, suci. -Epesus 4:23, 24

Bareto, mungguh rohani mah aranjeun teh paeh ku karana dosa, baha ka jeung Kristus Yesus bareng dihindangkeun tina maot supaya milu marentah di sawarga jeung Kristus Yesus. -Epesus 2:1, 6

Aranjeun geus dihirupkeun bareng jeung Kristus. Upayakeun supaya bisa meunangkeun anu aya di sawarga, tempat Kristus linggih di tengeneun Allah. -Kolosa 3:1

Kristus ku anjeun geus ngabegbregan salira-Na dina kayu salib ku dosa-dosa urang, supaya urang bebas

tina kakawasaan dosa, hirup nurut-keun pangersa Allah. Raheut-raheut salira-Na ngalantarankeun aranjeun cageur. -1 Petrus 2:24

Napsu badan jeung sagala panga-jakna teh ku jelema anu geus jadi kagungan Kristus Yesus mah geus dipaehkeun. -Galata 5:24

Kapan urang teh geus maot tina dosa, piraku bisa keneh hirup dina dosa...Aranjeun oge nya kitu, kudu ngarasa yen diri geus maot tina dosa, tapi geus hirup deui jeung Allah ku jalan Kristus Yesus. -Rum 6:2, 11

Sakumaha oorayan tambaga ku Musa ditanjeurkeun dina tihang di gurun keusik, nya kitu Putra Manusa oge kudu diangkat ka luhur, supaya saha bae anu percaya ka Anjeunna bisa meunangkeun hirup langgeng. Saha bae anu percaya ka Putra-Na bakal meunang hirup langgeng; tapi anu teu anut ka Putra-Na, moal boga hirup, sabalikna bakal tetep aya dina hukuman Allah.

-Yohanes 3:14, 15, 36

Uphana dosa teh maot, sabalikna ari kurnia Allah mah nya eta hirup langgeng sarta ngahiji jeung Kristus Yesus Gusti urang. -Rum 6:23

Dupi hirup langgeng teh nya eta: Terang ka Ama, Allah sajati anu mung hiji, sareng ka utusan Ama, Yesus Kristus. -Yohanes 17:3

Melak anu asalna tina kahayang badani, tina eta pepelakan, maot nu bakal kaala. Melak anu asalna ti Roh Allah, hirup langgeng anu asal ti Roh Allah nu bakal kaala. -Galata 6:8

Kaula ngomong saenyana: Sing saha anu ngaregepkeun omongan Kaula jeung percaya ka anu ngutus Kaula, tinangtu hirup langgeng, moal di hukum, malah ucul tina paeh sarta asup kana hirup. -Yohanes 5:24

Pikeun bukti yen aranjeun putra-putra Allah, Allah ngutus Roh Putra-Na ka jero hate aranjeun, nya eta Roh anu nyambat ka Allah, "Ama, nun Ama!" -Galata 4:6

Sing saha anu narima jeung ngalampahkeun parentah-parentah Kami, eta tandaning nyaah ka Kami. Sing saha anu nyaah ka Kami, bakal dipikaasih ku Rama; Kami oge tangtu bakal mikaasih jeung bakal nganyatakeun diri ka manehna. -Yohanes 14:21

Anaking, nyaah teh ulah ngan semet biwir jeung ucap wungkul, kudu nyata dina prakna. Ku jalan kitu

urang terang yen urang aya dina kayaktian ti Allah. Lamun geus terang kitu, urang aya di payuneun Allah teh bisa ngarasa teger. -1 Yohanes 3:18, 19

Ku sabab urang geus diterapan Roh-Na, yakin yen hirup urang aya dina kasatunggalan jeung Mantenna, kitu keneh Mantenna satunggal jeung urang. -1 Yohannes 4:13

Tapi tekad bapa tetep, sabab nyaho pisan ka anu dipercaya ku bapa. Sarta bapa yakin yen Mantenna kawasa ngajaga eta amanat-Na anu dipercayakeun ka bapa nepi ka Poe Kiamat. -2 Timoteus 1:12b

Ayeuna Abdi sumeja wangsul ka Ama. Perkawis ieu ku Abdi diunjuk-keun sabot di dunya keneh, supados maranehna tiasa ngarasakeun sapi-nuhna rasa suka hate Abdi. -Yohanes 17:13

Di Karajaan Allah mah nu penting teh lain hal anu didahar jeung diinum, tapi nya eta bener lampah, hirup rukun, narimakeun reujeung suka sakur anu dipaparinkeun ku Roh Suci. -Rum 14:17

Ayeuna anu hirup di jero diri sim kuring geus lain sim kuring, tapi Kristus. Ieu hirup anu keur dilako-

nan teh, hirup reujeung percaya ka Putra Allah, anu geus ngurbankeun hirup-Na ku anjeun ku tina asih-Na ka sim kuring. -Galata 2:20

Nu matak dibarejaan kitu teh supaya kabungah Kami jadi kabungah maraneh, jeung supaya kabagjaan maraneh lengkep sampurna. -Yohanes 15:11

Aranjeun nyaraah ka Yesus Kristus, padahal can nenjo-nenjo acan, aranjeun percaya ka Anjeunna sanajan ayeuna Anjeunna geus teu katenjo. Ku sabab kitu aranjeun bakal meunang kabungah anu taya catur-keunana. -1 Petrus 1:8

Urang terang, jelema anu kumawula kudu ngawula kana parentah nu dikawulaan, boh ngawula kana dosa anu temahna maot, boh ngawula ka Allah anu ngalantarankeun bisa diangken deui ku Mantenna. -Rum 6:16

Aranjeun anu ayeuna lara balang-sak, kitu deui sim kuring, bakal diluginakeun ku Allah, ari Gusti Yesus sumping ti sawarga diiring ku para malaikat anu garagah, sumping dina gedurna seuneu. Anjeunna bakal ngahukum sakur anu nolak ka Allah jeung ka anu embung narima Injil Kasalametan hal Yesus Gusti urang.

Maranehna bakal ngarasa hukumanana, binasa salalanggengna, dipe-clengkeun ti payuneun Gusti jeung ti lingkungan kakawasaana-Na anu agung. -2 Tesalonika 1:7-9

Sabab jelema anu dibenerkeun ku Allah teh lain ku sabab nyaho kana eta Hukum, tapi ku sabab ngalakonan sakur anu diparentahkeun ku Hukum tea. -Rum 2:13

Salamat jelema anu jubahna geus beunang nyeuseuh beresih, meunang ngadahar buah tangkal kahirupan, meunang asup ka eta kota liwat lawang-lawangna. -Wahyu 22:14

34 NGANGKEN KA KRISTUS TEH PERYOGI PISAN

Kabeh bakal ngaku Yesus Kristus teh Gusti. Ku hal eta Allah Rama dimulyakeun.
-Pilipi 2:11

"Anu ngaku di hareupeun umum yen anut ka Kami, ku Kami ge tangtu diaku di payuneun Ama Kami di sawarga. Anu ngangles di hareupeun umum magar lain anut ka Kami, ku Kami ge tangtu diangles di payuneun Ama Kami di sawarga."
-Mateus 10:32, 33

Lamun aranjeun ngaku jeung percaya yen Yesus teh Gusti, anu ku Allah geus digugahkeun tina maot, tangtu aranjeun salamet. Ku jalan percaya, urang bisa diangken bener

ku Allah, sarta ku jalan ngaku ka Anjeunna urang tangtu salamet.

-Rum 10:9, 10

Anu teu ngaku ka Putra-Na, eta teu ngaku ka Rama-Na. Anu ngaku ka Putra-Na, eta ngaku ka Rama-Na.

-1 Yohanes 2:23

Lamun jelema era ngaku ka Kami jeung kana pangajaran Kami, Putra Manusa oge bakal era ngaku ka eta jelema, lamun Anjeunna engke sumping dina kamulyaana-Na jeung kamulyaana Rama katut kamulyaana malaikat-malaikat saruci.

-Lukas 9:26

IBLIS TEH MUSUH URANG NU UTAMA 35

Sing caringcing taki-taki, sabab Iblis musuh aranjeun keur guar-gaur kawas singa, kukulayaban neangan leglegeun.
-1 Petrus 5:8

Ti dinya Yesus dicandak ku Roh ka gurun keusik, sina digoda ku Iblis...Ku Yesus diwaler, "Geura nyingkah, Iblis! Kieu ceuk Kitab Suci: 'Maneh kudu nyembah ka Pangeran, Allah maneh. Ngan Mantenna anu kudu dibakti!' "Iblis nyingkah ti Yesus. Geus kitu sarumping malaikat ngalalayanan ka Yesus.

-Mateus 4:1, 10, 11

Manusa jahat tea munculna nyangking pangawasa Iblis, nyieun rupa-rupa mujijat jeung rupa-rupa kaahengan anu nyasabkeun.
-2 Tesalonika 2:9

Sing samakta ku pakarang-pakarang ti Allah, malar tagen ngayonan tipu daya Iblis.
-Epesus 6:11

Bareuntakeun panonna, tarobatkeun tina poek kana caang, tina pangawasa Iblis kana kakawasaan Allah, sina palercaya ka Kami supaya dosa-dosana bisa dihampura, jeung mareunang tempat di kalangan umat Allah.

-Rasul-rasul 26:18

36 KAUNGGULAN NU NGELEHKEUN IBLIS

Geus kitu kakara eta Manusa Jahat teh datang nembongkeun maneh. Tapi dina mangsa Gusti Yesus sumping, manehna bakal paeh ditiup ku napas anu ngahebos tina baham Gusti, lebur ku kilat tina salira-Na.
-2 Tesalonika 2:8

Ku sabab kitu masing sumerah ka Allah. Iblis kudu dilawan, tangtu kabur ti aranjeun. Allah raketan, Mantenna ge tangtu ngaraketan deui.
-Yakobus 4:7-8a

Ku lantaran jelema-jelema anu ku Anjeunna disebut anak teh mahluk tina sipat daging jeung getih, Yesus ngajadikeun salira-Na sasipat jeung

maranehanana, hirup Anjeunna sakumaha hirup maranehanana, sarta manah-Na ikhlas nyorang pupus, supaya ku jalan kitu iasa ngabinasakeun Iblis anu kawasa kana maot.

-Ibrani 2:14

Jadi, saha anu bisa megatkeun asihna Kristus ka urang? Naha kabalangsakan, atawa panganiayaan, atawa kalaparan, atawa kamalaratan, atawa bahaya, atawa maot, bisaeun megatkeun?...Moal, moal bisaeun! Eta kabeh malah geus eleh, urang geus unggul ku pitulung Anjeunna anu welas asih ka urang!

-Rum 8:35, 37

KAASIH MANGRUPIKEUN UJIAN PIKEUN JADI MURID 37

Sanajan upama sim kuring bisa ngajar make rupa-rupa basa manusa, atawa malah bisa make basa malaikat, ari teu nyaah ka batur mah pangajaran sim kuring teh teu beda ti sora goong atawa genta, harus tapi taya hartina.
-1 Korinta 13:1

Ku jalan silih pikanyaah jeung baturana, bakal katara ka sareng yen maraneh teh murid-murid Kami.

-Yohanes 13:35

Sabalikna anu hirupna dituyun ku Roh Allah mah sipatna teh nyaahan, galumbira, resep rapih, tengtrem hate, sabar, hade ka batur, leuleuy,

satia, handap asor, nahan napsu.
-Galata 5:22, 23a

Lamun aya anu majar nyaah ka Allah tapi ngewa ka dulurna, eta teh bohong. Sabab lamun ka dulur anu katenjo bungkeuleukan geus teu nyaah, komo ka Allah, anu henteu tempong.
-1 Yohanes 4:20

Geus kitu mariksa deui kadua kalina, "Simon anak Yonas, enya hidep nyaah ka Kami?" Walon Petrus, "Sumuhun Gusti, Gusti uninga yen abdi nyaah ka Gusti." Saur Yesus, "Panguruskeun domba-domba Kami."
-Yohanes 21:16

38 GUGAHNA DEUI YESUS KRISTUS

Sagala perkawis anu ku Anjeunna dipidamel di tanah Isra'il sareng di Yerusalem, Bapa sareng babaturan saksina. Anjeunna ditelasan ku urang Yahudi, dipaku dina kayu salib. Nanging dina katilu dintenna ti saparantos pupus, ku Allah dihirupkeun deui lajeng diebrehkeun. Nanging diebrehkeunana henteu ka sadayana, mung ka sawatara urang anu ku Allah parantos dipilih baris jadi saksi, nya eta Bapa sareng babaturan.
-Rasul-rasul 10:39-41a

Ku karena dosa urang, Yesus disenrenkeun sina ditelasan, ti dinya dihirupkeun deui ku Allah, supaya ku

jalan kitu urang bisa diangken jelema bener ku Allah.
-Rum 4:25

Heuleut saminggu ti harita murid-murid kumpul deui di jero imah anu kamari ieu, Tomas oge aya. Pantona ditulakan, tapi Yesus sumping, ujug-ujug geus ngadeg di dinya. Tuluy ngalahir, "Salam rahayu." Ti dinya ngalahir ka Tomas, "Rampakeun ramo maneh kana ieu, tenjo ieu leungeun Kami. Sodorkeun leungeun maneh, cabak ieu cangkeng Kami. Geus, ulah cangkaya, sing percaya!" "Gusti sim abdi, Allah sim abdi!" walon Tomas.

-Yohanes 20:26-28

DIGUGAHKEUN DEUI, PANGHAREPAN ANU MULYA PIKEUN URANG 39

Sing percaya lamun ceuk Kaula bakal aya mangsa anu paraeh bakal ngadareng soara Putra Allah. Eta mangsa ayeuna oge geus mimiti. Anu ngadareng kana soara-Na tinangtu hirup. Ulah hareran, pasti datang mangsa anu paraeh bakal ngadareng soara Anjeunna, tuluy kaluar ti jero kuburna. Anu keur hirupna hade, harudangna bakal terus kana hirup langgeng, anu keur hirupna jahat harudangna pikeun narima hukimanana. -Yohanes 5:25, 28, 29

Aranjeun ge terang, yen waktu u-

rang dibaptis supaya ngahiji jeung Kristus Yesus, eta urang dibaptis teh supaya maot jeung Anjeunna. Jadi ku eta baptisan teh urang geus dikubur jeung Anjeunna, milu maot jeung Anjeunna, supaya sakumaha Kristus geus digugahkeun ku kakawasaan Rama anu mulya, urang oge bisa nyorang hirup anu anyar. Ku sabab urang geus ngahiji jeung Kristus sarta maot bareng jeung Anjeunna, nya kitu keneh urang bakal dihidu-dangkeun tina maot saperti Anjeunna, bakal hirup ngahiji jeung Anjeunna.
-Rum 6:3-5

40

KASUCIAN KANGGO GUSTI

Ka Ibrahim rama urang Mantenna sumpah, jangji ngaleupaskeun urang ti musuh-musuh, sarta ngidinan urang ngabdi ka Mantenna kalawan taya karisi. Sangkan urang di payuneuna-Na mulus jeung bener saumurumur.
-Lukas 1:73-75

Dulur-dulur! Eta jangji teh kabeh ditujkeunana ka urang. Ku sabab kitu urang kudu miceun sagala rereged lahir batin, hirup kudu beresih jeung kudu ajrih ka Allah.
-2 Korinta 7:1

Jalma anu beresih tina kajahatan bakal dipake pikeun pagawean anu

penting, husus keur Gustina baris di-
anggo ngajalankeun pagawean-paga-
wean mulya. -2 Timoteus 2:21

Mugia aranjeun ginanjar rahmat rahayu ti Allah. Geus jadi pangersa Allah Rama aranjeun ku Mantenna dipilih dijadikeun umat-Na anu geus disucikeun ku Roh Mantenna sangkan aranut ka Yesus Kristus, supaya bebas tina dosa ku jalan disucikeun ku getih Anjeunna. -1 Petrus 1:2

Sabalikna masing suci kalakuan, sabab Allah anu geus nyaur aranjeun teh suci. -1 Petrus 1:15

KASUCIAN KANGGO GUSTI

41

Sabalikna lamun ngakukeun dosa ka Allah, urang bakal dipaparin bukti tina hal jangji-Na, nya eta dihapusna dosa, jeung disucikeun tina sagala lampah urang anu salah.
-1 Yohanes 1:9

Kaula ngabaptis aranjeun teh ku cai, pikeun tanda yen aranjeun geus tarobat. Tapi anu engke sumping pandeurieun kaula, ngabaptisna teh ku Roh Suci jeung seuneu. Anjeunna leuwih agung ti batan kaula, mangjingingkeun tarumpah-Na ge kaula geus teu layak. -Mateus 3:11

Malah ti memeh dunya gumelar, urang geus dipilih baris dijadikeun milik kagungan Mantenna ku disa-

tunggalkeun jeung Kristus, supaya suci jeung mulus di payuneuna-Na.
-Epesus 1:4

Eta sababna Yesus oge ditelasanana di luareun kota, getih Anjeunna nyucikeun umat-Na tina dosana.
-Ibrani 13:12

Sing akur jeung pada batur, kudu diajar hirup suci, sabab lamun teu kitu pamohalan bisa patenjo jeung Gusti.
-Ibrani 12:14

Hidep sing sakedah polah sangkan kaanggo ku Allah, jadi pagawe anu teu era ngemban parentah Mantenna, jeung bener ngajarkeunana amanat kayaktian Allah.
-2 Timoteus 2:15

42

JALMI ANU DIPINUHAN KU ROH SUCI

Tapi hirup aranjeun mah henteu nurutkeun tabeat sorangan, geus nurut ka Roh Allah. Kitu soteh lamun bener Roh Allah aya di jero hate aranjeun. Saha-saha anu henteu ngabogaan Roh Kristus, eta lain kagungana-Na.
-Rum 8:9

Sakumaha jahatna maraneh, tangtunya anak! Komo deui Rama maraneh nu di sawarga mah! Mantenna tangtu maparinkeun Roh Suci ka sing saha anu menta ka Mantenna.
-Lukas 11:13

Tapi maraneh, lamun Roh Suci geus sumping bakal narampa kawasa,

pikeun jaradi saksi-saksi Kami di Yerusalem, di sakuliah Yudea, di Samaria, nepi ka tungtung bumi.
-Rasul-rasul 1:8

Tamat pakumpulan nenedana, tempat anu keur dipake kumpul teh inggeung. Aranjeunna dieusian Roh Suci, jadi kacida laludeungna nguarkeun pangandika Allah.
-Rasul-rasul 4:31

Aranjeun kudu tarerang, raga aranjeun teh tempat tinggalna Roh Suci, Roh paparin ti Allah, dilinggihkeun di jero diri aranjeun. Diri aranjeun lain boga aranjeun, tapi kagungan Allah. -1 Korinta 6:19

JANGJI-JANGJI ENDAH PIKEUN URANG KRISTEN

43

Sing percaya ka PANGERAN, lampahkeun nu hade pek cicing di lemah cai, sing tengtrem.
-Jabur 37:3

Dulur-dulur! Ulah kaget ku cocoba anu sakitu peurihna, kawas anu lain samanea. Malah kudu atoh dumeuh nandangan sangsara saperti Kristus, sabab engke lamun Kristus geus nganyatakeun kamulyaana-Na, aranjeun bakal pinuh ku kabungah.
-1 Petrus 4:12, 13

Nepi ka ayeuna maraneh can barang penta naon-naon mawa ngaran Kami. Pek marenta, tangtu bakal na rima,

sangkan kasenangan hate maraneh sampurna.
-Yohanes 16:24

Mantenna bakal nyusutan cipanon maranehna. Paeh, kasedih, picaurikeun, kanyeri, moal aya-aya deui. Sakur nu heubeul geus sirna.
-Wahyu 21:4

Upayakeun heula diri tunduk kana parentah jeung pangersa Allah. Sagalakaperluan maraneh mah tangtu ku Mantenna dipaparin.
-Mateus 6:33

Kami tangtu nyarengan ka maraneh salalawasna nepi ka ahir jaman.
-Mateus 28:20b

44 JANGJI-JANGJI PIKEUN JALMI ANU KAGODA

Ku jalan kitu Anjeunna iasa nulung ka sakur anu keuna ku cocoba, lantaran Anjeunna oge geus nandangan cocoba jeung sangsara.
-Ibrani 2:18

Allah sumber kabagjaan urang, bakal gancang-gancang ngaremmukkeun Iblis, pikeun idekeun aranjeun.
-Rum 16:20a

Jalma bener memang loba kasahna, tapi pasti ku PANGERAN di-jait tina sakabeh karerepetna.
-Jabur 34:20

Urang terang, sagala perkara ku Allah diatur sina alu pijadieunana pikeun sakur anu cumantel ka Mantenna, anu ku Mantenna geus disa-

laur sakumaha tujuan Mantenna.
-Rum 8:28

Unggal cocoba anu kasorang ku aranjeun kabeh oge jamak kaalaman ku sarerea. Tapi Allah anu tigin kana jangji-Na, moal ngantep aranjeun meunang cocoba leuwih tina kakuatatan. Satiap aranjeun meunang cocoba, ku Mantenna dipaparin kakuatatan jeung jalan kaluarana.
-1 Korinta 10:13

Salamet jelema anu tabah ku gogoda, sabab sanggeusna tamat nahan eta gogoda, manehna bakal nampa ganjaran nya eta hirup anu sajati sakumaha jangji Allah ka sakur anu nyaah ka Mantenna.
-Yakobus 1:12

JANGJI-JANGJI PIKEUN JALMI ANU UNGGUL

45

Saha-saha anu unggul ku Kami rek dibawa diuk ngarendeng dina tahta Kami, cara Kami sanggeusna unggul diuk gedengeun Ama Kami dina tahta-Na.
-Wahyu 3:21

Ku sabab kitu lamun enya boga ceuli, regepkeun kumaha dawuhan Roh Allah ka jamaah-jamaah! Sing saha nu unggul, ku Kami rek dibere ngadahar buah tangkal kahirupan nu aya di Taman Allah. -Wahyu 2:7

Jelema anu unggul ku Kami rek dijadikeun ibarat hiji tihang baitna Allah Kami sarta moal ngiser deui ti dinya. Dirina rek diukiran ku jengengan Allah Kami jeung ngaran

kota panglinggihana-Na, nya eta Yerusalem anyar, anu bakal turun ti sawarga, ti Allah Kami. Kitu deui ngaran Kami anu anyar rek diukir dina dirina.
-Wahyu 3:12

Sing saha nu unggul, bakal make pakean kitu bodasna, jeung ngaranna ku Kami moal dicoret tina kitab catetan anu harirup, bakal diangken yen kagungan Kami di hadirat Ama Kami jeung para malaikat-Na.
-Wahyu 3:5

Sakur nu unggul eta putra Kami, ku Kami rek dibere cai eta, Kami pijadieun Allahna. -Wahyu 21:7

46 DAWUHAN GUSTI ALLAH NGEUNAAN PIPIRAKAN

Pikeun anu eukeur laki rabi, ieu aya nasehat. Lain ti sim kuring, tapi nasehat ti Gusti. Pamajikan teu meunang ninggalkeun salaki. Tapi lamun nepi ka ninggalkeun kudu tetep lelengohan, atawa alusna mah balik deui ka salaki, kitu deui salaki teu meunang nyerahkeun pamajikan.

-1 Korinta 7:10, 11

"Lalaki anu nyerahkeun pamajikanana tuluy kawin ka awewe sejen, eta lalaki teh jinah; kitu deui lalaki anu ngawin awewe anu geus diserahkeun, eta oge lalaki teh jinah."

-Lukas 16:18

Contona, awewe kabeungkeutna ku hukum ka salakina teh ngan satungtung salakina hirup keneh. Sapanjang salakina hirup keneh, lamun eta awewe milu ka lalaki sejen, disebutna awewe serong. Kajaba lamun salakina geus maot, meunang kawin deui sarta sah, lain jinah.

-Rum 7:2, 3

rahkeun pamajikan lain ku sabab pamajikanana nyelewer, sarua jeung ngalantarankeun awewena ngaranyed. Lamun awewena kawin deui ka nu sejen, lalaki anu ngawinna oge kaasup ngaranyed.

-Mateus 5:32

SUMPINGNA DEUI KRISTUS ANU KADUA KALINA 47

Sangeus nyadiakeun pitempateun maraneh, Kami ti ditu tangtu bakal datang deui nyokot maraneh, supaya maraneh oge aya di tempat Kami.

-Yohanes 14:3

Kami teh tereh datang. Sakur anu geus beunang ku maneh cekel sing pageuh, supaya ganjaran kaunggulan maneh ulah aya anu ngarebut.

-Wahyu 3:11

Dulur-dulur oge kudu kitu, kuat-keun hate, moal lila deui ge Gusti sumping.

-Yakobus 5:8

Jelema anu era ngaku ka Kami jeung kana pangajaran Kami dina jaman anu doraka jeung jahat kawas ayeuna, Putra Manusa oge lamun

geus aya dina kamulyaan Rama-Na jeung para malaikat saruci, bakal era ngaku ka jelema kitu.

-Markus 8:38

Geus kitu tembong di langit tanda Putra Manusa. Barang narenjo Putra Manusa sumping nitih mega di langit tur kawasa jeung kacida agungna, jelema-jelema bakal ear sasambat.

-Mateus 24:30

Tah ayeuna urang teh jadi putra-putra Allah, ngan bae tacan terang engkena kumaha. Kakara terang yen lamun Kristus geus sumping, urang bakal jadi saperti Anjeunna, sabab bakal nenjo Mantenna kumaha nu sajatina.

-1 Yohanes 3:2

48 SUMPINGNA DEUI KRISTUS ANU KADUA KALINA

Putra Manusa mah pisumpingeunana lir kilat meuntas langit ngabaranyay ti wetan ka kulon.

-Mateus 24:27

"Regepkeun! Kami datang mo kasangka-sangka ibarat datangna bangsat. Salamet nu nyaring ngajaga pakeanana, moal taranjang leumpangna di tengah umum sarta moal nandangan kaera!"

-Wahyu 16:15

Nya kitu maraneh oge kuda carringcing ngadago pisumpingeunana Putra Manusa, sabab pisumpingeunana teh dina waktu anu teu kasangka-sangka pisan.

-Lukas 12:40

"Keur naraon narangtung di dieu taranggih ka langit, urang Galilea? Yesus anu dicandak ka sawarga teh engke bakal sumping deui cara kitu, sakumaha anu bieu katarenjo ku maraneh keur mungghahna ka sawarga."

-Rasul-rasul 1:11

Moal lila deui Putra Manusa teh bakal sumping nganggo kamulyaan Rama-Na, diiring ku para malaikat-Na, rek ngabales ka unggal jelema satimpal jeung kalakuanana.

-Mateus 16:27

Geus kitu breh Putra Manusa tembong, sumping dina mega, kacida kawasa-Na, kacida mulya-Na.

-Lukas 21:27

DAWUHAN ALLAH

Langit jeung bumi bakal musna, tapi pangandika Kami mah moal datang ka musna.

-Lukas 21:33

Waler Yesus, "Aranjeun kacida kaliruna, lantaran tacan ngalarti kana Kitab Suci jeung kana kakawasaan Allah."

-Mateus 22:29

Jeung jelema mah moal aya anu bisa sorangan ngawartakeun dawuhan Allah perkara nu bakal pi-jadieun engke. Nabi-nabi oge ngawejangkeunana teh estu ku karana pangersa Roh Suci.

-2 Petrus 1:21

Eusi Kitab Suci, sagemblengna wahyu ti Allah, sarta mangpa'at pi-

keun ngawurukkeun kayaktian, pikeun ngaweweleh anu salah, pikeun ngomean kasalahan, jeung pikeun nungtun kana hirup bener.

-2 Timoteus 3:16

Pangandika Gusti teh lampu pikeun abdi, sinar caang nu nyaangan jalan abdi.

-Jabur 119:105

Pangandika Allah teh nya hirup, nya kuat, tur leuwih seukeut ti batan pedang nu seukeut kenca katuhu, sanggup nusuk nepi kana nyawa jeung jiwa, tembus kana tulang sandi jeung sungsum, bisa maca pikiran jeung angen-angen manusa.

-Ibrani 4:12

Teks Basa Sunda Pitulung Nu Datang Ti Luhur diambil dari Kitab Suci LAI ©1991. Dikutip atas izin Lembaga Alkitab Indonesia.

Published in numerous languages by World Missionary Press as God supplies funds in answer to prayer. If you would like more copies for careful distribution, please write to us in English.

W. M. Press, Inc.
P.O. Box 120
New Paris, IN 46553-0120 USA

www.wmpress.org

Sundanese HFA